

Develo di e estatua di nos Libertador, Betico Croes mahestuoso y impresionante



Apesar cu su number no a keda menciona:

Dochi Lee tabata e motor tras di realizacion di e estatua nobo di Betico

Danki na un trabao incansabel e statua a wordo devela; de lo contrario e ta drumi ainda na Cumana!

STA. CRUZ – Su number no a keda menciona durante di e ceremonia oficial pa devela e estatua nobo, sinembargo Solo di Pueblo si ta bon na alltura cu e homber cu a percursa pa e estatua aki keda devela ta nada mas y nada menos cu Dochi Lee. Mas cu claro e ta haciendo un trabao pa su ruman kende ta Minister Ramon Lee. Nos no por keda keto y nos mester menciona publicamente cu e homber ariba caya y den field cu a traha pa esaki ta Dochi Lee. Na Dochi ta bay un palabra di danki pa su empeño pa realiza dos proyecto pa Betico. E prome ta e estatua nobo cu tabata drumi na Cumana pa añanan largo. E otro proyecto awor pa realiza ta e museo di Betico Croes na cas di su mayorman. Ta asina

cu Gobierno di Aruba lo bay cumpra e cas di e mayorman di Betico y di es forma aki lo converti esaki den un museo como tambe un plaza nobo den Sta. Cruz. Betico su bario natal, unda lo bay pone e estatua chikito ariba e plaza. Tur trabao tin envolvimento directamente di Dochi Lee y si no ta pa Dochi Lee su empeño awe lo no tabata tin e develo di e estatua nobo. Algun hende den comunidad ta laga nan curazon wordo guia door di emocion y tin ocasion cu net esnan cu ta traha duro pa realiza algo grandi asina, mester soporta y wanta palabranan menos agradabel. Sinembargo apesar di tur cos nos mester duna cesar loke ta di dje y den e caso aki nos mester bisa cu Fundacion Betico

Croes a priminti hopi, a recauda fondo, a haci teleton pero sin e extra empuhe pa realiza mucho cos. Te dia di awe tin un borchu cu ta indica un proyecto di Fundacion Betico Croes situa otro banda di Botica Maria, un proyecto cu lo mester a bira Monumento Betico Croes realiza pa Fundacion Betico Croes. Sinembargo nos no ta tuma e fundacion na malo pasobara nos sa cu cualkier proyecto ta exige inversion cuantioso. Pero danki atrobe na Dochi Lee cu Minister Ramon Lee, logicamente cu bendicion di Gobierno di Aruba cu despues di 20 aña nos ta mira movecionnan interesante pa Betico. E pueblo di Betico Sta. Cruz porfin por mira cu algo a y lo sigui wordo haci pa Betico.



Develo di estatua di nos Libertador, Beti

STA. CRUZ—Diasabra anochi, dia 11 di Maart a tuma lugar e develo di e estatua di Betico riba Plaza Libertador Betico Croes. Presente tabata gobernador interino, sra. Christina van de Berg. E anochi tabata uno hopi emocional mirando tambe presencia di mandatarionan Arubano, entre otro nos Minister Presidente, sr. Nelson Oduber, Minister di Husticia, sr. Rudy Croes, Minister di Salubridad, sr. Booshi Wever, Minister di Economia y Finanzas, sr. Nilo Swaen y e motor tras di e proyecto, minister Ramon Lee. Tambe tabata presente presidente y vice-presidente di Parlamento, sra. Mervin Wyatt-Ras y sra. Zulay van Poppel cu nan distinguido esposo. Di e parlamentarionan presente nos por menciona entre otro Edwin Jacobs, Marlon Werleman, Kenneth Jong y sr. Mike Eman y su distiguida esposa y tambe sr. Padu Lampe, autor di nos Himno. E anochi a cuminsa cu Himno di Aruba sigui pa algun orador: A hiba palabra nos Min. pres. Nelson Oduber, Minister di Cultura, Ramon Lee. Tambe a hiba palabra e yiu mayor di betico, Guisette Croes kende a gradici e gobierno, en especial e motor, Minister Ramon Lee pa despues di tanto aña a sa di concretiza e proyecto aki. A invita nietonan di Betico Croes pa devela e estatua, por cierto un bunita gesto ya cu ta nan ta esnan cu lo sigui transmiti e historia di nos Libertador pa e siguiente generacionnan. Señora di Betico, sra. Glenda Croes y yiu nan tabata presente pa e

acto inolvidabel aki; Glenbert y esposa, Guisette, Glendeline y Junior y su esposa, Jessica. Presidente di Comision Dianan Nacional, sr. Frank Croes tabata e prome orador y Minister Presidente a sigui elabora riba e trayectoria y historia di Betico kende a lucha incansablemente pa nos pais Aruba, culminando su lucha cu e Status Aparte cual el'a obtene na 1983 den e RTC na Den Haag. Na 1985 Betico a firma e acuerdo di diamanta. Aunke esaki a bay cu un condicion: Status Aparte mara na un Independencia na 1996. Mester menciona cu nos Min. Pres. sr. Nel Oduber a sa di schrap e fecha aki na 1995.

Na e momento culminante a yama e nietonan di Betico dilanti: Gilberto François Croes, Mario Antonio Croes, Lara Isabella Croes y Thiara Gabriela kendenan lo tabata tin e tarea pa devela e estatua di nan abuelo. E momento aki tabata hopi emocionante y a yena hopi wowo cu lagrima. E cantante, Edjean Semeleer a dedica na Betico y na e publico un cancion despues di e develo, 'Danki na dje'. Na un momento hopi oportuno Edjean a sa di canta e cancion cu tabata pas pa e momento aki. Por cierto un cancion hopi bunita y bunita canta pa Edjean Semeleer, nos idolo Arubano.

Naturalmente no tabata tin un momento mas oportuno pa Grupo di Betico trece cancionnan dedica na Aruba pa e publico. Un pabien na e comision organizador, un anochi tremendo y emocionante.



